

四庫全書

集部



欽定四庫全書

弇州四部稿卷一百六十二

明 王世貞 撰

說部

宛委餘編七

偶一時人賦詩有陸通姓名人不曉所謂余謂此楚狂接輿也見莊子疏然詩入接輿則雅入陸通則俗此不可不知也按何氏餘冬序錄考姓名頗詳然亦有未備



者因增記於此倉頡姓侯剛氏見古篆文註許由字武  
仲見莊子釋文堯姓伊祁少昊名摯字青陽帝嚳名俊  
成湯字高密見帝王世紀臯陶字庭堅孤竹君姓墨名  
台見孔叢子註伯夷名允一名元字公信叔齊名智字  
公達見論語疏中子名伯遼見周曇詠史詩當作仲遼  
見帝王世紀彭祖姓錢音錢名鏗見論語疏其子名胥餘  
見莊子司馬彪註老子父名乾字元杲見前涼錄老子  
初生時名玄祿見玄妙內篇管叔名度見史記註易牙



名亞見孔穎達疏逢蒙之弟名鴻超楊朱之弟名布見  
列子伯樂姓孫名陽師曠字子野見莊子疏公孫弘字  
次卿見鄒長禧書子產一名美見左傳註杜康字仲寧  
見魏武短歌行註孟軻字子輿見漢書并孔叢子又字  
子居見聖證論莊周字休見列子註孫叔敖名饒見孫  
叔碑計然一名研一名倪又姓辛字子文見史記索隱  
文種字子禽見吳越春秋陳仲子字子終見皇甫謐高  
士傳漢高祖父太公名崑見後漢書註又名曄字執嘉



見皇甫謐帝皇世紀昭靈后名含高祖兄仲名喜曹參  
字敬伯申公名培見史記註項伯名纏字伯見漢書註  
叔孫通名何見楚漢春秋東園公姓轅名秉字宣明夏  
黃公姓崔名廓字少通綺里季姓朱名暉字文季冉里  
先生姓周名述字元道竝高士傳壺關三老茂姓令狐  
見荀悅漢紀楊王孫名貴見西京雜記次非亦名荆軻  
見續博物志伏生名勝字子賤見西漢碑文翁名黨字  
文翁見張崇文歷代小誌張宗字諸君杜茂字諸公見



陳忠傳記註楊子雲所稱李士元者名弘見蜀秦宓傳  
鄭子真名樸嚴君平名遵見王貢兩龔傳註張宗字諸  
公見陳忠傳註施延字君子見後漢書註田生字子春  
見楚漢春秋侯芭字鋪子見論衡丁公名固見楚漢春  
秋衛夫人名鑠字茂漪見翰墨志綠珠姓梁白州人見  
小傳呂安字仲悌君苗姓應瑒從弟俱見文選註花卿  
名敬定見舊唐書僧一行姓張名璿見續博物志竇滔  
字連波見武后記失馬塞翁姓李見高谷詩序



男子有雙名者夏主赫連勃勃吐蕃將乞藏遮遮國相  
尚婢婢唐琵琶客羅赫赫樂工紀孩孩劒客精精兒空  
空兒李懷光外孫燕八八元學士承旨庫庫平章政事  
和和

婦人雙名者隋煬帝宮婢羅羅元微之傳崔鶯鶯又范  
十郎女鶯鶯張建封妾盼盼開元中宮伎薛瓊瓊宋宣  
仁太后小名滔滔朱端朝取妓馬瓊瓊杜牧之所狎妓  
張好好元微之所歡錢唐妓謝好好畫中美人真真又



沈將軍妾真真又元名妓趙真真同時馮漫濟妻趙真真  
錢唐妓蘇小小私藏千牛女達奚盈盈又王山所接仙  
女吳盈盈錦官城妓灼灼翟素死節婢青青常青姬紅  
紅朱虞部姬寵寵北里妓王蘇蘇鄭舉舉王蓮蓮張住  
住錢唐倡楊愛愛善和坊妓端端武氏妓賽賽張虞卿  
妓英英又楚州官妓王英英秦州妓香香范十郎女燕  
燕宋善畫婦人任才仲妾艷艷徽宗幸妓李師師義妓  
毛惜惜又張幼謙妻羅惜惜成都角妓丁憐憐又湖州



妓丁憐憐魏鵬妻賈娉娉榴花女石醋醋劉諷遇鬼仙  
女翹翹又理宗宮人翹翹元名妓荆堅堅李心心顧山  
山馮六六辛弃疾妾田田錢錢又有別號雙字者金趙  
學士元吳真人俱閒閒馮山人存存近有表謙謙

鳥雙名者青丘灌灌又鵲鵲

同上

崇吾蠻蠻藥山羅羅又

鸛鸛周周見禽經行扈氏喑喑宵扈氏嘖嘖

見獨斷

獸雙名者招搖往往姑逢徹徹空桑軫軫泰山洞洞泰  
戲辣辣霍山朏朏枚臯文文又南中猩猩北荒蛩蛩交



廣萬萬

音

即拂拂也 羊 羊 螳螂也

魚雙名者 剛山蠻蠻 洛水庸庸

見山海經

又揚州禺禺

見王會解

婦人以五色名者 前青青紅紅又紅綃紅線紅拂紅鑿  
紅娘紅兒輕紅飛紅絳仙絳樹絳桃絳真丹霞紫光紫  
緩碧玉綠珠素女素娥又仙女青童相如賦美人有青  
琴

四同名者 真真三同名碧玉

樂府小  
家女

又

太元中司  
馬義妻

又

喬

之妾即  
竊娘也

玉兒

潘妃

又

元樹

又

陳敬瑄

又

營妓



二同名者飛燕

漢趙后唐寶歷宮中美人

朝雲

河間王琛婢蘇子瞻妾

夜來

魏文

帝姬天寶名妓

及前鶯鶯好好英英瓊瓊惜惜翹翹憐憐

漢名士稱涼州三明太尉段熲紀明度遼將軍皇甫規  
威明大司農張奐然明也出一時以為奇矣晉南渡而  
後瑯邪諸葛恢潁川荀闓陳留蔡謨俱字道明而皆有  
名號中興三明人為之語曰京都三明各有名蔡氏儒  
雅荀葛清然則前後有兩三明而後則字俱同前則同  
郡各奇也



湘東王有同姓名錄其書今不存聊舉其灼灼者在同  
時如兩曾參一曾參殺人而致曾子之母投杼兩毛遂  
一毛遂墮井而致平原君之痛哭異世則魯秋胡因婦  
採桑調其妻投水死漢亦有魯秋胡求聘翟公女翟公  
誤傳調妻事以為薄行而不許婚俱可笑也其次如國  
師公劉秀以名應圖讖為王莽所殺而取王莽者為光  
武亦劉秀莽遣太師安新公王匡攻更始定國上公王  
匡不勝為所執殺唐李尚書益與宗人尚書益者俱赴



飲據上坐因笑曰今日兩副坐頭俱李益代宗用韓翃  
知制誥宰相以平盧幕府員外及江淮刺史請上書春  
城無處不飛花絕句云用此韓翃而員外得之事皆奇  
其它同時者漢時兩韓信俱高帝時一封楚王一封韓  
王三召平一故秦東陵侯一為陳王上柱國一齊相恐東  
陵侯即陳王柱國為陳封者秦自王兩王恢俱武帝時  
剪父子外少微侯矣不應有東陵侯一浩侯一大行謀誘匈奴者也兩王臧武帝朝其二年  
以郎中令自殺一六年為太常兩王商俱成帝外戚一



為丞相樂昌侯一為大司馬成都侯兩王章俱哀帝時  
一河平三年以太僕為右將軍六年復為太常一四年  
以京兆尹直言死兩王崇俱平帝時一新甫侯故丞相  
嘉子一大司空扶平侯魏兩王烈一字彥方有隱德一  
字長體有道術晉兩王渾一為涼州刺史係戎之父一  
為司徒係濟之父兩王澄一即濟弟封侯一即戎從弟  
荊州都督兩孫秀一吳降將一趙王倫嬖臣俱拜驃騎  
將軍封公兩周撫一為王敦將一為彭城内史誅梁兩



王琳一散騎常侍一德州刺史唐兩李光進俱代宗朝  
一為光弼弟一為光顏兄俱蕃將賜姓為節度使封公  
兩李繼昭俱昭宗時一為孫德昭一為符道昭俱賜姓  
名降朱梁為使相宋兩王著俱太祖時一以文學典制  
一以書學待詔金兩烏格俱大將

稍先後者吳兩公子慶忌一王僚子一夫差末年將楚  
兩莊蹻一莊王時大盜一莊王裔孫將軍平滇自王者  
漢兩王莽一右將軍一大司馬篡位者兩王鳳一大司



馬大將軍一更始成國上公兩王譚一宜春侯一平阿  
侯兩徐幹一都護班超司馬一丞相曹操掾晉兩劉毅  
一光祿大夫一衛將軍兩張禹一丞相一太傅俱封侯  
兩解系一見陶璜傳一自有傳兩王愷一武帝舅一安  
帝時丹陽尹元兩巴延一太傅淮陽王一大丞相秦王  
兩蕭鈞一蕭鸞子梁武時中書郎一蕭瑀從子唐太宗  
時率更令

異代而相類者兩王肅曹魏中領軍為魏制禮元魏尚



書令亦為魏制禮兩王殷朱梁以節度使叛誅後周太祖亦以節度使誅兩王彥章梁大將為晉擒吳統軍為楚擒兩王珪唐侍中宋左僕射門下侍郎皆門下相也兩王溥一唐懿宗一周世宗俱宰相

仙人有兩王喬其一即子晉也其一為栢人令天墮玉棺以塋者僧有兩智永一梁書僧一宋畫僧

光武時固始侯李通魏武時都亭侯李通衛大夫王孫賈齊大夫王孫賈魏徐邈字景山見重武帝為侍中晉



徐邈字仙民見重武帝為中書舍人魏將軍張遼漢兗州刺史張遼字叔高漢中郎將江革梁御史中丞江革梁李膺為蜀使至郡武帝悅之問曰今李膺何如昔李膺對云云晉文公有咎犯平公有咎犯善隱任政李密以祖母老辭官後魏李密以母老習醫又隋末蒲山公李密則天時王方慶為相又王方慶領尚藥奉御高宗初張昌宗為脩文館學士則天末張昌宗為春官侍郎漢宗室多同名者其自列侯以下或應有之乃至諸王



亦自相犯何也豈非以宗正之失職耶余不能盡志姑  
志其顯者四劉慶六安王河間孝王更始燕王清河孝  
王四劉章城陽景王高密頃王齊哀王常山靖王三劉  
嘉梁荒王瑯琊康王漢中王三劉雲城陽哀王廣德夷  
王東平煬王三劉定沛釐王彭城頃王甘陵貞王兩劉  
長淮南厲王濟陰悼王兩劉榮臨江閔王沛幽王兩劉  
遂趙叛王梁夷王兩劉交楚元王濟北懷王兩劉壽濟  
北惠王瑯琊恭王兩劉勃濟北貞王常山王兩劉勝中



山靖山平原懷王兩劉武梁孝王城陽惠王兩劉玄淮

陽文王淮陽王

始即更

兩劉旦燕刺王長沙煬王兩劉賀

泗水戴王昌邑王兩劉授河間頃王膠東共王兩劉寵  
陳愍王樂安夷王夫以王賀廢主然泗水先封名之同  
猶可也淮南竄死趙遂燕旦以反絕國何所取而同之  
此大不可解者也

有以人而名器物者阮咸製阮遂名為阮咸今名阮王

右軍好鶩遂名鶩為右軍

見釋  
常談

康伯傳外國豉遂名康



伯

見博志

僧鑒虛製湯羊遂名湯羊為鑒虛

今無之

番人畢

羅好食湯麪遂名湯麪為畢羅

今傍加食

今人於豕肉豆腐

及它巾服之類皆加以東坡名謂為眉山所製也有以

器物而名人者令狐僕射楚小婢善歌李商隱錦瑟詩

名錦瑟韋中令臯伎善吹簫名玉簫

韋事見傳奇

兄弟稱二龍者漢許虔許劭齊柳怱柳惔五龍即竇儀

兄弟六龍者晉卞粹及溫羨八龍者漢荀儉組靖燾注

爽肅專唐崔瑄珙璿璿璿珎球珎



兄弟三虎者賈彪

兄弟三鳳者河東薛氏

昔人有父字其子者曹丞相操每下教稱子桓右軍與  
人書謂子敬飛白大有勢子字其父者胡毋謙之見父  
輔之暑月搖扇視事呼之曰彥國胡為自貽伊感從子  
字其叔父者袁種謂盎曰南方卑濕絲能日飲亡何說  
王母反而已有臣字其君者光武幸章陵宗室諸母酣  
悅相謂曰文叔少時謹信與人不款曲惟直柔耳今乃



能如此

唐文皇為天策上將開天策府置十八學士房杜等多  
至宰相後薛收卒以劉孝孫補之楚王馬希範亦為天  
策上將開府幕僚拓跋恒李弘皋廖匡圖徐仲雅等十  
八人亦授學士

舜重瞳項羽重瞳隋魚俱羅朱梁康王友敬永樂中楚  
王子亦俱重瞳文王四乳宋范鎡百常父子明倪文僖  
謙俱四乳



泗州僧伽頂有一孔以絮室之發絮則異香出氛氲滿  
室佛圖澄左乳下一孔圍七寸亦以絮室之夜欲讀書  
發絮則光照一室時時水邊引腸胃滌之復納於內物  
理有不可致詰者重瞳四乳不足道矣

倉頡四目唐有三耳張秀才

柳子厚記李赤死廁鬼事以為其人慕李白故名赤已  
可笑矣霏雪錄所載慕太白者張碧字太碧慕樂天者  
黃居難字樂地又富家子杜四郎自號荀鴨以比杜荀



鶴者尤可笑也

有舉孝廉而為人主者魏武吳大帝也狀元及第而為人主者夏主李遵項也

事有極可笑異者楚懷王死於楚為人所憐項梁立其孫心亦號楚懷王以謚為爵也元世祖年號曰至元其後順帝慕之亦改年曰至元林邑王范揚邁死太子咄立慕父之德亦名揚邁也

父子同名者二人隋處士羅靖父亦名靖及范揚邁魏



大將安同父名屈子亦名屈然則韓退之所云期其杜  
度不足道也史記鄭武公掘突譙周以為突滑而孫厲  
公突索隱以為皆非也

王彪之臨之納之准之輿之進之凡六世王胡之茂之  
裕之璿之秀之凡五世王羲之獻之靖之悅之凡四世  
王晏之崑之陋之徐逵之湛之聿之凡三世胡毋輔之  
謙之吳隱之瞻之顏悅之愷之兩世俱仍之字

漢有劉箕子朱孫卿許顏回晉有王彭祖梁有庾晏嬰



庾黔婁祖孫登又孫權女孫魯班宋翟馬周皆掩古人姓名

其命名有可笑者秦將軍孔子胡熟侯劉聖人更始劉聖公于闐國王李聖天辛太公若乳母王聖則女子也取字有異者史記註仲雅字熟哉又北齊將軍劉乾字天

雙名而一字者任不齊字選顏之僕字叔之類也名與字同者張巡字巡之類也



師曠識駁識諫珂

狐身鳥首

識首陽之神

狸身狐尾

其二諫其一

謏東方朔識駟牙識巫雀識藻廉

水木之精長八九寸

識恠哉其

### 一謏其二諫

管子知俞兒

卑耳溪神

東方朔又知畢方

獨足鶴

張寬知女人

星劉向知貳負

上郡山中械一足屍

賈逵知鸞鸞胡綜知秦始皇

厭王氣物諸葛恪知侯囊

山精如小兒

陸敬叔知彭侯

狀如黑狗

無尾竇攸知鼯鼠張華知龍鮓

以苦酒沃之五色

知海鳧毛知干

將知臨平石鼓

以蜀中桐材刻為魚形叩之則鳴

知銅澡盤

晨夕鳴與洛中宮鍾



相 應 知九館龍洞知然石

以水灌之便熱

知玉漿龍穴石髓束皙

知顯節陵科斗策賈淵知苟晞兒豕王粲知服礬人豕

裴子野知白題國何承天知亡新威斗陸杳知紫荷索

又知千里酒又知古犧樽許敬宗知帝丘李珣知內黃

傅弘業知蛙

形如豕仰鼻長尾有岐

蘇綽知西漢故倉地杜鎬知

秦哀公墓李章武知鐵斧為禁物沈約知東夷菴盖

瓦具

高九尺銳下平盖中有罍一蓋塋器也

陸澄識服匿

單于賜蘇武酒器

傅奕知金

剛石孟詵知藥金段成式知報時鐵董養知周會狄地



下有蒼白  
驚飛去

盧若虛識鼯鼠

狗首虎臄  
大如拳

杜鎬知雀錫僧贊

寧知畫牛隱見

見首  
卷中

劉敞知龍雀刀

赫連勃  
勃鑄

又知周惡

夫印為亞夫印劉蛻知古銅盎非齊桓公物斛斯徵知

鐔于

以芒銅振  
之清響

祖瑩知于闐國王故玉印徐鉉知海馬

骨高裕知陵鯉

陸澄與王儉等徵事候商略畢談所遺漏百千條皆儉  
所未覩又與何憲等徵事悉并其舊物奪之何憲在王  
儉宅徵事以最優得五色簾白羽扇王攜後至悉奪之



沈約與梁武徵粟事少其二沈約策劉顯十事顯對其  
九劉顯策約五事約對其二梁武策錦被事已盡劉孝  
標最後出十餘條南唐鉉錯策猫楚金多五十事元陳  
呂數驢剛中少三十條

古今事有絕相類者今記之以供撫掌之資如瘦沈語  
前有約後有昭略寄怨詩妻之寶前有玄後有滔望車  
塵之潘前有黨後有岳善畫婦人為帝殺之毛前有延  
壽後有惠遠致冰解之王前有祥後有延弔客驢鳴之



王前有粲後有濟又銅錢作埒之王前有濟後有元寶  
立銅柱之馬前有援後有撻射石之李前有廣後有遠  
種玉得妻之陽前有洛陽雍伯後有盧龍翁伯怖小兒  
之麻胡前有秋後有祐又有劉胡及鬼俱曰麻胡凡四  
見

聖主時投水人知有卞隨務光而不知有北宮無擇騎  
青牛人知有老子而不知有封達生空桑人知有伊尹  
而不知有孔子

見春秋  
孔演圖

白魚入舟人知有周武王而不



知有宋明帝河漸水合人知有漢光武之滹沱而不知  
有慕容德之黎陽鳳雛號人知有龐統而不知有顧邵  
獻胙加毒以讒賜死人知有晉獻公子申生而不知有  
秦孝文王子西蜀侯憚思妾令方士致魂人知漢武之  
於李夫人而不知宋武之於殷淑儀治阿譽聞而阿不  
治人知有齊宣王之大夫而不知景公之晏子夢寐求  
相人知高宗之傳說而不知文王之臧丈人題壁作龍  
蛇歌人知有晉文之介子推而不知晉文之舟之僑秦



許楚地而背之人知張儀之於楚懷王而不知馮章之  
於楚王先食不死之藥而巧言以免死人知方朔之於  
漢武帝而不知中射之士之於楚王一字直百金人知  
淮南子而不知公孫子

丞相  
弘著

妻棄夫人知朱買臣而不

知太公望沈江負父屍人知有孝女曹娥而不知趙社  
女絡掘地得石擲人知有滕公而不知有衛靈飛廉看  
竹不問主人知有王徽之而不知有袁粲倚柱讀書雷  
震不輟人知有夏侯玄而不知有諸葛誕獲偷侍兒人



試文不殺因以賜之人知有楊素之於李伯藥而不知  
有蔡興宗之於孫敬玉侍婢環執飲饌人知有王武子  
而不知有楊國忠孫晟國忠晟又俱號肉臺盤羊羹不  
徧致敗人知華元之於御斟而不知中山王之於司馬  
子期乳生漣人知有元德秀而不知有李善綵衣娛戲  
人知有老萊而不知有伯瑜知囊人知有晁錯而不知  
有樗里子魯匡讀易至損益而歎人知有向平而不知  
有孔子佩六印人知有蘇秦而不知有藥大以石為虎



射之沒羽人知有李廣李遠而不知有熊渠子又王充  
論衡云是養由基充以由基射晉侯中目而不能殺之  
為辨極可笑射楚王中目者呂錡由基以一矢射錡伏  
歿而死也逐兔墮馬折肋而殂人知齊主高演而不知  
燕主慕容皝倒用印人知有段秀實之阻朱泚而不知  
有李崧之安蜀一日殺二義士人知有袁紹之於臧洪  
陳容而不知有張敬兒之於邊榮程邕之能使人主前  
席人知有賈誼而不知有商鞅蘇綽飲十日酒至期發



塚而醒人知有劉玄石而不知有趙英御屏隔座人知  
有漢鄭弘第五倫而不知有吳紀亮紀隲杯中蛇影人  
知有樂廣而不知有南皮令應柳樂弓應弩殺孝婦大旱三  
年人知有前漢之東海而不知有後漢之上虞萬石君  
人知有石奮而不知有秦襲張文瓘留犢事人知有時  
苗而不知有羊扁食脫粟人知有公孫弘而不知有晏  
嬰錢神論人知有魯褒而不知有胡毋民成公綏記半  
面人知有楊惛而不知有應鳳陳蕃下榻人知有徐穉



而不知有周球雪中高卧人知有袁安而不知有胡定  
夢贈筆人知有江淹而不知有王彪之王珣紀少瑜陸  
倕李白和凝馬裔孫

其事  
稍異

噀酒救火人知有樂巴而不

知有樊英邵信臣郭憲佛圖澄成武丁入水戮蛟人知  
有周處而不知有澹臺子羽荆欽飛菑丘訢羊車游後  
宮鹽水灑地人知有晉武而不知有宋文御膳中有髮  
自數三罪以免死人知晉平公之庖人而不知光武之  
陳正因病嘗糞人知越王勾踐之於吳王夫差而不知



郭弘霸之於魏元忠以酒賜妬婦飲之無恙人知太宗  
之於房玄齡而不知莊宗之於任圜即席盡器飲酒歸  
而尚醒稱所得器人知裴弘泰之於裴鈞而不知潘炕  
之於朱梁太祖下第獻燕詩座主以明年登第人知有  
章孝標而不知有于化成刻石高山深谷人知有杜預  
而不知有顏真卿賜行酒炙人知有顧榮而不知有何  
遜陰鏐一箭落雙鷗人知有斛律光而不知有拓拔幹  
高駢錦纜事人知有隋煬而不知有甘寧然脂膏為燭



人知有董卓而不知有滿奮還帶陰德至相位人知有  
裴中令而不知有白中令少孤門生廢蓼莪人知有王  
裒而不知有顧歡發塚類遠祖貌人知有蕭穎士之於  
鄱陽王而不知有吳綱之於長沙王入山妻二仙女久  
而歸人知有天台之劉晨阮肇而不知剡縣之袁栢狼  
碩因食辨勞薪人知有荀勗而不知有師曠強索妾人  
知有孫秀武承嗣而不知有阮佃夫聞鼓角聲加敬人  
知有范雲之於梁武而不知有劉仲舉之於陳武告靈



不仕人知有王羲之而不知有何偃通它心觀人知有忠國師之於大耳三藏而不知有普寂之於柳中庸祭賽忘書刀在廟鯉魚為送人知有馬當山之王昌齡而不知有宮亭湖之估客奕棋覆局人知有王粲而不知有到溉製十字文人知有周興嗣而不知有蕭子範贈柳妾人知有韓翃而不知有李還古即位御床陷地人知有桓玄而不知有侯景誤食澡豆人知有王敦而不知有陸暢殞逆旅書生人知有王忱而不知有鮑子都



廖有方橋神貌醜以足潛畫之人知有定州之張平子  
而不知有忖留神之魯般駱駝負水養魚軍中人知有  
宋孫仁祐而不知有隋虞孝仁殺負心僕人知有張詠  
而不知有柳開金蓮歸院人知有蘇軾而不知有王珪  
雋不疑劉德大將軍光先後欲以女妻之俱辭不敢當  
俱病免後不疑以青州刺史為京兆尹德以青州刺史  
行京兆尹事皆多所平反

張崇還鎮率埒鬚錢趙在禮還鎮亦率拔釘錢



庾杲之貧人云誰謂庾郎貧食鮭常有二十七種李崇富而吝人云李令公食常十八種蓋庾惟三韭崇二韭也南北一時事相類若此

漢蔡琰有胡笳十八拍王昭君有胡笳三十六拍至二十一拍

晉秦中賈滔妻蘇氏作迴文詩八百一十二字唐范陽盧母王氏作天寶迴文詩文亦八百一十二字

晉平公出言而不當師曠舉琴而撞之跌衽宮壁魏文



侯出言而不當師經舉琴而撞之中旒潰之一見淮南  
子一見劉向說苑燕太后不肯以少子質齊因陳翠愛  
少子之說而許趙太后不肯以少子質秦因左師觸龍  
愛少子之說而許一見趙世家一見戰國策高齊神武  
不貴慕容紹宗以留文襄唐文皇暫出李勣以留高宗  
俱見本紀申鳴援桴而進戰為賊殺其父功成而自殺  
趙苞援桴而進戰為賊殺其母功成而毆血死一見說  
苑一見後漢書醫緩脈晉平公而曰君之病在膏之下



育之上秦武王示扁鵲病而曰君之病在耳之前目之上謂皆以色致也一見左傳一見戰國策東方朔知赤物為恠哉飲酒十石李章武知鐵斧為厭物飲血三斗一見搜神記一見酉陽雜俎懷素習書盡數畝芭蕉鄭虔習書盡數屋柿葉俱見法書錄孫臏臏於魏而為齊帥司馬喜臏於宋而為中山相一見本傳一見呂氏春秋王濟以錢千萬與王愷賭射八百里牛一勝而探牛心爾朱文略以好婢與高歸彥賭射千里馬一勝而截



馬頭一見晉書一見北齊書鄂千秋明蕭何功高立封  
侯公孫戎明樊噲不反立封二千戶一見蕭何傳一見  
王莽傳兗州刺史李恂郡園小麥胡麻悉付從事揚州  
刺史費遂郡園小麥胡蒜悉付從事一見東觀漢記一  
見謝承後漢書孫權得諸葛恪而以老素熟龜精張華  
得雷煥而以老素辨狐精一見搜神記一見集異志漢  
郭林宗遇雨中角折人遂為折角巾周獨孤信馳馬帽  
微側人遂為側帽一見後漢書一見北史嚴峻為吳大



帝誦孝經仲尼居張輔吳昭以為鄙生請誦君子之事  
上章陸澄為齊武帝誦孝經仲尼居王衛軍儉以為博  
而寡要請誦君子之事上章一見吳志一見南齊書吳  
大帝夢人以筆點額熊循賀以為當作主齊文宣夢人  
以筆點額王曇首賀以為當作主俱遂即位一見吳祚  
國統志一見齊書魏文帝為王時夢日墮地分為三分  
已得一分納懷中陳文帝微時夢亦然後俱為三分之  
主一見談藪一見陳本紀張茂先白鸚鵡夢為鷺鳥搏



楊太真白鸚鵡亦夢為鷺鳥搏一見異苑一見明皇雜錄歐陽率更見索靖碑初看云浪虛得名次日看曰名下定無虛士坐卧其下十日不能去閭立本見張僧繇畫亦然見宣和書畫譜楊司空素出見客挾侍姬紅拂因奔李靖郭太尉子儀出見客亦挾侍姬紅綃因奔崔氏一見虬髯客傳一見崑崙奴傳二人又皆劍俠也

郭汾陽與馮道亦有相類者郭以尚父太尉中書令汾陽王馮以太師中書令瀛王終俱八十餘又有女俱配



龍王皆許之而死塑骨於廟亦大奇人有題馮女廟者  
身既事十主女亦配九龍可供一笑

劉賓客禹錫以集賢學士至京李司空紳罷鎮歸禹錫  
過之出名姬佐酒禹錫賦詩所謂司空見慣渾閒事惱  
斷蘇州刺史腸者李即以姬贈之劉後分司還洛有姬  
甚美李司空逢吉以計邀而奪之劉作四詩以擬四愁  
投李李但含笑而已竟不答末句有料得夜來天上鏡  
只應偏照兩人心語不知所奪之姬即所贈者否但以



一禹錫而兩李司空者一贈姬一奪之可作笑柄及杜  
牧之以御史分司過留守宴問美姬紫雲而欲得之朗  
吟而起其人亦李司空也名聰





弇州四部稿卷一百六十二



欽定四庫全書

集部

弇州四部稿卷一百六十三

詳校官侍讀學士<sub>臣</sub>陸伯焜

中書<sub>臣</sub>劉源溥覆勘

總校官原任中允<sub>臣</sub>王燕緒

校對官庶吉士<sub>臣</sub>陳墉

謄錄監生<sub>臣</sub>江軾



欽定四庫全書

弇州四部稿卷一百六十三

明 王世貞 撰

說部

宛委餘編八

愚嘗惟南燕慕容德登高譙羣臣語如齊魯固多君子  
當昔全盛之時接慎巴生淳于鄒田之徒蔭脩檐臨清  
沼馳朱輪佩長劍恣非馬之雄辭奮談天之逸辯指麾



則紅紫成章俛仰則丘陵生韻至於今日荒草頽墳氣  
消烟滅永言千載能不依然又如曹景宗既貴謂所親  
曰我昔在鄉里騎快馬如龍與少年輩數十騎拓弓弦  
作礮礮聲箭如餓鴟噉中澤中逐麋數肋射之渴飲其  
血饑食其胃甜如甘露漿覺耳後生風鼻端出火此樂  
使人忘死今來揚州作貴人動轉不得路行開車慢小  
人輒言不可開置車中如三日新婦此邑邑使人氣盡  
此等語雖小愧大雅殊自竒麗德拓跋景宗武人其能



言尤可恠耳昔人謂史臣借飾之語恐亦未然

晉文即位探策得一羣臣失色裴成公進曰臣聞天得一以清地得一以寧侯王得一以為天下貞梁高祖問王侍中朕為有為無對曰陛下應萬物為有體至理為無宋文帝釣天泉池垂綸不獲王景文曰臣以為垂綸者清故不獲貪餌元魏高祖名子恂愉悅懌崔光名子幼勗勉高祖曰我兒名傍皆有心卿兒名傍皆有力對曰所謂君子勞心小人勞力周武自彈琵琶屬梁王蕭



歸舞因起謝曰陛下既親撫五絃臣敢不率同百獸此雖取捷供奉語不妨雅致若桓玄即位御牀陷而殷仲文曰將由聖德深厚地不能載梁武宮門災謂羣臣我意方欲更新之而何敬容曰此所謂先天而天弗違又武帝即位有猛虎入建康郭象入江陵上意不悅以問羣臣羣臣無敢對者王瑩在御筵歛板對曰昔擊石拊石百獸率舞陛下膺錄御圖虎象來格縱極澹辭不能令人不嘔穢



今世所稱返壁蓋左傳所謂受殽而返壁也若以周敬王事擬之則佳秦始皇事擬之則不雅子朝與敬王戰投壁於河後二日津人得之於岸將賣之石也已敬王事定獻之復為玉秦使者夜過華陰平舒道有人持壁遮使者曰為我遺鎬池君因言曰今年祖龍死使者奉壁具以聞使御府視壁乃二十八年行渡江所沈壁也西京雜記茂陵富人袁廣漢於北邙山下築園東西四里南北五里又何武葬北邙山薄龍坂東王嘉冢東北



一里然則長安故自有北邙不止洛中也今考志記俱無之

書稱歸馬華山之陽放牛桃林之野蓋官不復錄為兵車用置之民間聽其耕牧而已程大昌因其地在河山阨東取孔穎達引杜預為證云華山之旁尤乏水草非長養牛馬之地欲使自生自死腐儒穿鑿一至於此不知革車三百兩為馬千二百匹所須地幾何可發一笑漢文帝臨廁韋昭所謂夾二水而臨其岸也慎夫人如



廁與武帝據廁見衛青溷廁之廁也

立仗馬據顏魯公疏以為起自太宗其門司式曰無門籍有急奏令仗家引對不得闕礙防壅蔽其立仗馬二須乘者聽程大昌以為太宗招言勤政至意至開元天寶禮儀立仗馬李林甫所云一鳴輒斥即今仗馬制也而招言勤政之意失矣按此馬及仗當在外朝人主行幸它所或深宮而所謂急奏者必上變告警之類耳若方御朝豈有乘馬徑入理且必不以是待上言時事者



也白虎樽尚有發者而竟太宗朝不聞乘仗馬奏事人大昌之說恐亦無據

晉史袁彥伯宏在桓公府作東征賦而不及宣城一日桓命同載問君何以東征賦不及家君袁云尊公稱謂既非下官敢專既未遑啓不敢顯之耳公疑不實乃曰君欲為何辭袁應聲曰風鑒散朗或搜或引身雖可忘道不可隕宣城之節信義為允桓泫然而止又世說新語彥伯東征賦都不道陶公胡奴誘之狹室中臨以白



刃云先公勲業如何以相忽畧袁寔便答我大道  
公何以云無因誦曰精金百鍊在割能斷功則在人職  
思靖亂長沙之勲為史所讚按此必有一誤彥伯豈有  
為桓客而遺宣城者使出無意則伏玄度已言之若使  
出有意不足見才而適來豐隙或胡奴之說差為近之  
今人知司馬長卿為賦客而不知為經術士又不知為  
文翁弟子也按秦宓傳宓云蜀本無學士文翁遣相如  
來受七經還教吏民由是蜀學比於齊魯故地里志曰



文翁倡其教相如為之師又云雖有王孫之累猶孔子  
大齊桓公羊賢叔術宜立祠堂速定其銘

每讀楞嚴經云貪明為罪遇精為形名題題鬼和銷報  
盡生於世間多為應類酬足為人叅合文類貪成為罪  
遇明為形名役使鬼明滅報盡生於世間多為休徵酬  
足為人叅合明類不免一自哂吾儕豈亦貪明貪成之  
報耶然據佛氏言則帝釋天福盡尚墮五通僊見身有  
盡一應神道俱屬修羅閻羅主者亦是業報固無恠也



劉向識貳負桎梏之尸蓋僵尸數千年不朽者也鄆溪水側有重人穴穴中有僵尸不知年載按記云人以五月五日生者尸不腐

今人正五九月不上任唯京朝官則不拘也在唐宋亦然按戴植鼠璞云釋氏智論天帝釋以寶鏡照四大神州每月一移察人善惡正五九月照南瞻部洲唐人以此三月不行死刑曰三長月節鎮因戒屠宰不上官宋人多以是三月食素誦經已可笑矣今於正五九月不



斷屠宰但不上任尤無謂也

今人稱法令曰令甲以漢宣帝詔令甲死者不可生然是法令首卷曰江充傳註令乙騎乘行馳道中章帝詔曰令丙簞長有數見鼠璞甚明然則令乙者第二卷也令丙者第三卷也漢律當有十卷

曲逆縣按博水濡水自源東逕其縣故城南枉者迴湍率多曲復亦謂之為曲逆水張晏曰湍水於城北曲而西流是受此名而氏曲逆矣左傳哀四年齊國夏伐晉



取曲逆又竹書紀年魏殷臣趙公孫哀伐燕返城曲逆  
漢高帝以封陳丞相貧其富而不辭亦不求改名至王  
莽始改為順平矣

地里志言高奴縣洧水上有肥可用之博物志言酒泉  
南壽縣南山出泉水大如筍注池為溝水有肥如肉汁  
取著器中始黃後黑如凝膏然極明與膏無異膏車及  
水碓缸甚佳北方謂之石漆又云水肥水經注銅雀臺  
北曰水井臺高八丈上有水室室有數井深十五丈藏



冰及石墨焉石墨可書又然之難盡亦謂之石炭陸士龍貽兄書三臺上曹公藏石墨數十萬斤云燒此消後可用然烟中人不知兄頗見之否今送二螺即此物也水經注言犍為朱提縣山水險奇數百言而不及朱提銀事亦一漏也朱提銀比之他銀極貴價可益十之五見食貨志武帝時以銀為幣至平帝而始有朱提銀耳周穆王時有燭銀其光可鑒曰天子之寶蓋不以為幣也



余欲登太和山閱近所刻志不能舉永樂以前事及山  
所由名攷一統志亦無之按道元水經注云武當山一  
曰太和山亦曰崇上山山形特秀又曰僊室又荊州圖  
副記曰山形特秀異於衆嶽峯首狀博山香爐亭亭遠  
出藥食延年者萃焉晉咸和中歷陽謝允捨羅邑宰隱  
遁斯山故亦曰謝羅山

余過襄陽城之十餘里為習家池不能二畝許乃是流  
泉匯而為池耳前半里許俯大江按水經注沔水逕蔡



洲與襄陽湖水合水上承鴨湖東南流逕峴山西流東南流注白馬陂水又東入侍中襄陽侯習郁魚池郁依范蠡養魚法作大陂陂長六十步廣四十步池中起釣臺池北亭郁墓所在也列植松篁於池側沔水上郁所居也又作石伏逗引大池水於宅北作小魚池池長七十步廣十二步西枕大道東北二邊限以高堤楸竹夾植蓮芡覆水是遊宴之名處也山季倫之鎮襄陽每臨此池未嘗不大醉而還恒言此是我高陽池故人為之



歌曰此公出何去往至高陽池日暮倒載歸酩酊無所知然則今之習池非復昔之舊矣又其地高不可引湖水

用脩以方城為萬城其可笑不待言伯晦引史記阻之以鄧林緣之以方城又我悉方城外及服虔杜預之說以闢之似矣然不如盛弘之荊州記之明切也其云葉東界有故城始顰縣東至瀨水達泚陽界南北綿聯數百里號為方城一謂之長城南北雖無基築皆連山相



接而漢水流其南故屈完云云何其易曉也郡國志葉縣有方城郭仲產曰苦菜于東俱有方城又楚狂接輿耕於方城之南蓋皆傍此長山方城而名者也

左氏焚巫尫謂其尫瘦鼻孔向上天憫之不為雨以故焚巫其言極俚可笑然古有祈雨而焚身者蓋不但焚巫也桂陽先賢畫讚臨武張熹字季智為平與今時天下大旱熹乃積柴自焚主簿崇小史張化從熹焚焉焚後靈雨澍應又濟北戴封字平仲為西華令旱乃自焚



天雨火滅官至太常後之焚身者僧也

余往者赴晉陽臬踰上黨見刻石有孔子迴車處辨以  
孔子臨河而返必不至其地於紀行筆之矣及覽酈道  
元水經註云諸子史籍之文竝言仲尼臨河而歎是非  
太行迴轅之言也然又云邗水東南逕孔子廟東廟庭  
有碑魏太和元年孔靈度等以舊字毀落上求脩復野  
王令范衆愛河中太守元真刺史咸陽公高允表聞立  
碑於廟則其事亦已久矣今廟與碑俱不存後人緣而



刻此五字也

歷山有三處一統志云濟南城南五里有歷山即舜耕處鄭康成謂歷山在河東而曾子固辨其非子固似未讀水經也按酈道元註云河東郡南有歷山謂之歷觀舜所耕處也有舜井為汭二水出焉南曰為水北曰汭水迺歷山下上有舜廟又周處風土記曰舊說舜葬上虞又記云耕於歷山而始寧剡二縣界上舜所耕田於山下多柞樹吳越之間名柞為櫪故曰歷山道元謂



周處此志為不近情傳疑則可證實非矣安可假木異名附山殊稱彊引大舜歷山為汭言是則安於彼乖矣然則寧剡尚在傳疑濟南猶似無據

每見人稱前導者伍伯晉書賈充戲庾純云君行常在人前今何以後蓋純之先人有為伍伯者按古今注云一伍之長也五人為伍曰伍伯一曰戶伯漢制兵吏五人一戶一竈每竈四直一伯故曰戶伯又曰大伯諸王公行戶服赤幘纁衣常赭率其伍以導引也



用脩著赤牘清裁既不序赤名所以唯於執林伐山載禽經云雛上無尋鷄上無常雉上有文鷄上有赤云赤與尺通莊子云斤鷄斤亦尺也此其所以謂之赤牘歟然則謂之斤牘亦可乎按漢西嶽石闕銘云弘農太守常山元氏張勲為西嶽華山作石闕高二丈二赤又北齊平等寺碑云銅像一軀高二丈八赤廣州記稱鰕鬚長四赤然則赤果與尺通也余故於廣赤牘改正作尺而記於此以見用脩未覩二碑也



用脩稱天子三河募少年為黃河折支河湟中河大可笑也此三河那得有少年募蓋河內河東河南近京師地耳

史記曹參傳蕭何為法顗若畫一徐廣注音古項反一音講漢書則云講若畫一文潁註講或作較顗訓直又訓明講訓和溫公通鑑遽改作較用脩譏之似也却又妄改顗作斟而云斟斗斛也較車耳也則用脩尤為可笑史記本文原無作斟註亦無斟斗斛訓且較之一字



豈車耳之外別無訓乎留侯傳史記作帷帳漢書作帷幄今亦以責之通鑑疑用脩不曾見漢書也

又云漢書遊於巖郎鍾繇表廟郎郎當作廊而皆省作郎者上廕下下承上也此却不然龜策傳紂為象郎豈亦下承上乎蓋古文通用耳

用脩能辨晉元非牛金所生且知其為誣辭而云魏道武名犍繼受命為牛繼馬後之像此又誤也道武初名涉圭後名珪犍者其父什翼犍也亦遠矣



唐人記宋延清二事吾皆疑之其一謂延清夜投杭州  
靈隱寺得句云鷲嶺鬱宮堯龍宮隱寂寥屬吟甚苦一  
老僧云少年何不言樓觀滄海日門對浙江潮遂終篇  
跡之乃駱賓王也其二謂劉希夷去年花落顏色改明  
年花開復誰在延清愛而欲有之不許遂以土囊壓殺  
之夫落花句雖自妍宛要非至者延清自多佳境何至  
苦欲得之其與賓王年事不甚相遠賓王集又有江南  
贈宋五之問及兗州餞別詩何得言非舊識若賓王果



為老僧而之問後謫過杭時亦且老矣不得呼少年止  
由二詩竝見集中而好事者欲以證希夷之橫死賓王  
之倖生故令延清受此長誣耳

傳奇稱徐敬業黃巢亦俱為僧以免黃巢有鐵衣着盡  
着僧衣語又一說宋開寶中八十老僧道價為叢林所  
重臨當歸寂從容示偈舒左足足底有黃巢二字又有  
載姚泓為終南山地僊事極詳要之皆誣罔耳

羅虬比紅兒不過市井間烟花語耳然唐詩紀事謂虬



手刃此伎而作詩追悼之恐誤蓋詩語有任伊孫武心  
如鐵不辦軍前殺此人又若教麤及紅兒貌爭肯樓前  
斬愛姬也恐紅兒自以他故死不由手刃

史記年表秦以君公主妻河君主註以它女為君主秦  
君之女也漢之子女曰公主壻曰尚諸王女曰翁主壻  
曰承

楊用脩證西施之沈江與陳晦伯之證西施隨范蠡以  
去俱各有所出難以臆斷第陳引吳地記句踐令范蠡



取西施以獻夫差西施於路與范蠡潛通三年始達於吳遂生一子至此亭其子一歲能言因名語兒亭此大可笑按記亭在嘉興縣南一百里為吳地范蠡為越成大事豈肯作此無賴事未有奉使進女三年於數百里間而不露露而越王不怒蠡吳王不怒越者齊東野人之談何足據也攷越絕書曰語兒鄉故越界名曰就李吳疆越地以為戰地至於柴辟亭女陽亭者句踐入官於吳夫人從道產女此亭養於李鄉句踐勝吳更名女



陽更就李為語兒鄉今稱女兒亭蓋誤合為一也晦伯之駁用脩真可謂夢中說夢矣

吳越春秋所載伍胥投水女溧陽然不知其人按李太白撰碑女姓史然則溧陽史在春秋已有之

用脩引符子云姓名人罕知況其書乎馬總意林亦不載下註云符子名朗東晉人見隋藝文志此亦不詳正史之故符朗不當作符按符堅載記後有朗傳堅之從兄子也秦亂投晉為王國寶所搆死著符子數十篇亦



老莊之流此書今收藏經中余嘗讀之豈僻人僻書也  
用脩云杜子美詩近來海內為長句汝與東山李白好  
流俗本妄改作山東李白樂史序李白集云白客游天  
下以聲妓自隨效謝安石風流自號東山時人遂以東  
山李白稱之子美詩句正因其自號而稱之耳流俗不  
知而妄改近世作大明一統志遂以李白入山東人物  
類而以杜詩為證近於郢書燕說矣按南部新書云李  
白山東人父為任城尉因家焉少與魯人隱徂徠山號



竹溪六逸天寶初游會稽吳筠隱剡中谷稱蜀人非也  
今任城令廳有白詞尚存至唐范傳正誌其墓曰白涼  
武昭王九世孫昭王隴西人隋末子孫以罪徙西域神  
龍時其父客自西域逃居綿之巴西而白生焉唐魏顥  
李陽冰序其文劉全白撰其墓碣皆曰廣漢人故論白  
者或曰隴西或曰山東或曰蜀李陽冰云李翰林浪跡  
縱酒以自昏穢詠歌之際屢稱山東李白亦云以張垞  
讒逐游海岱間子美所謂汝與山東李白好蓋白自號



也然則白本隴西人產於蜀嘗流寓山東子美從游時在山東故稱山東也此山東乃關東非今之山東也一統志固已俗然用脩亦所謂得其一未得其二者也

宋太祖詔天下重脩建帝王廟委州長吏躬親檢討儀相畫樣給付而中間有不相宜者秦始皇配有李斯漢景有周亞夫晁錯唐明皇有郭元振後唐莊宗有郭崇韜明宗有任圜安重進皆君臣不相終者也高辛以后稷配後魏孝文以長孫晟隋文時人不相值也後周



文帝以字文憲憲少子文帝卒時僅十六不應配也明  
皇不配姚宋而配張說王琚肅宗不配李郭而配苗晉  
卿裴冕霍光兩配武宣而不祠昭帝秦始皇朱梁太祖  
石晉高祖俱不應祀而祀中間如夏少康周宣王昭帝  
皆賢主而皆遺之趙中令諸公不學之過也女媧氏無  
配楊用脩攷三臣娥陵氏及聖氏隨氏以志其陋

今天下府名太原府乃宋太宗以晉王升者也延安府  
乃哲宗嘗封延安郡王升者也肇慶府徽宗以端王由



端州升者也襄陽府真宗嘗封襄王由襄州升者也慶陽府仁宗嘗封慶國公由慶州升者也建寧府孝宗封建王由建州升者也德安府神宗嘗為安州觀察使升者也獨宋太祖即位以宋州為南京應天府而我高皇帝首下建康定大業遂亦名南京應天府其脗合有如此者

今人以椿萱擬父母當是元人傳奇起耳大椿氏八千歲為春秋以擬父猶可萱引詩語言樹之背殊不切觀



唐元微之詩萱近北堂穿土早宋丁謂詩草鮮忘憂憂  
底事則唐宋人必不以萱擬母也橋梓所謂橋仰而高  
梓俯而卑周公之所以撻伯禽也却久

元魏御史中丞最為雄峻見崔暹高儼傳可紀然尚書  
省臣能禁止糾劾之孝文時中尉李彪以剛直聞事多  
專恣尚書左僕射李冲列其罪惡有司奏當大辟詔除  
名明帝初中尉元匡欲攻尚書令元澄澄奏其罪惡亦  
處死刑詔除名前後二十年內事也然冲與澄自劾彪



匡後皆不久而卒事固有相類如此者

陶隱居載漢高祖以始皇三十四年於南山得一鐵劍  
長三尺銘曰赤霄大篆書即斬蛇劍也及貴常服之光  
武微時在南陽鄂山得一劍文曰秀霸魏武帝以建安  
二十年於幽谷得一劍長三尺六寸上有金字銘曰孟  
德王以見人主受命之徵按西京雜記云斬蛇劍長七  
尺晉太康中武庫火飛去又載石勒耕地得一刀銘曰  
石氏昌篆書然劉曜讀書管涔山有管涔王遣童子奉



寶劍事見本載記而隱居不之及建安二十年武帝王業成矣此劍非所自創即其下偽為之以相鼓眩也

隱居又云漢平帝衍以元始元年歲次辛酉掘得一劍上有帝名因服之大篆書又宋順帝準昇明元年掘得一刀文曰上血光照一室帝竒之二年七月使楊玉候織女不得懼死用以弑帝所得亦非祥也然是蒼梧王昱不當作順帝準

李涪謂唐世郊天祭地止於再拜其禮至重不可加而



以婦拜姑章必四為非禮然則彼時不行四拜也方干處士每拜必三時謂之方三拜宋朱元晦孫為淮東提刑與顯者書必云萬拜時謂之朱萬拜皆可稱人妖

淮南王英布犯法黥後至有國遂稱為黥布五季周行逢為三鎮節度使加侍中宋狄青為使相俱少嘗黥面貴而不欲去其文今人但知狄而不知周也刖而至將相者孫臏司馬臏自刖者鬻拳自宮者豎刁

潘輿事今將母者通用之而不知潘以石崇事見法其



母固同與其禍也及瓜事今以為得代之期而不知瓜期不得代連稱管至父繇此為亂也含鷄舌香乃侍中刁存以年老口臭令含之墓碑生金在賈梁道廟以為晉中興之兆而庾氏為滅族之候俱不為佳事也

車二馬為麗三馬為駟四馬為駟鼓三百三十三槌為一通鼓止角動十二聲為一疊昏鼓四通為大鼙夜半三通為晨戒旦明三通為發昃

丹鉛錄稱後周靜帝令宮人黃眉墨粧云引葢黃無限



當山額又額黃無限夕陽山語為証謂唐尚然又引荆公詩漢宮嬌額半塗黃以為漢已有之詳語意乃是額間小黃靨耳非黃眉也若周天元帝禁天下婦人不得施粉黛自非宮人皆黃眉墨粧蓋眉不用黛而止用黃不欲其飾之美上等宮掖耳全非額黃意也亦非靜帝傳咸傳攀蚊髯附蝸翼然則蚊亦有髯乎列子以燕角之弓搆蓬之箭射虱之心而懸不絕虱亦有心乎蠻觸之國在蝸角闢而伏屍數百里蝦邦蟻郡又不足言矣



丹鉛餘錄載古鑑銘二以為唐人作按銘辭有長懸仁壽天子萬春語疑隋仁壽宮成於此鑄鏡也又如珠出匣似月停空當眉寫翠對臉傳紅亦似煬帝語

中國初無西瓜見洪忠宣皓松漠記聞蓋使金人貶遞陰山於陳王悟室得食之云種以牛糞結實大如斗絕甘冷可蠲暑疾丹鉛餘錄引五代邵陽令胡嶠陷北記云於回紇得瓜名曰西瓜其言與忠宣同以為至五代始入中國按忠宣使金乃稱創見則嶠嘗之於陷北之



日而不能種之於中國也其在中土則自靖康而後其在江南或忠宣移種歸耳

左傳孔悝之難太子懼下石乞孟黶敵子路以戈擊之斷纓子路結纓而死據論語隱義孟黶一曰狐黯以詐墜子路折股畏其目光不敢前曰請覆子之目子路以衣袂掩目遂殺之又師覺授孝子傳子路之子仲子崔欲報父讐殺狐黶告於夫子夫子曰行矣黶知之曰君子不掩人之不備須後日以蒲弓木戟與子崔戰而死



然則狐鰲蓋悔其詐殺子路而以死成子崔之孝者也  
事固不可信然亦足以少雪覆醢之辱矣

南史柳世隆由南兖州都督遷護軍時尚書令王儉為  
衛將軍脩下官禮甚謹世隆止之儉曰將軍雖存弘眷  
如王典何余嘗怪之以為衛將軍位在護軍將軍上何  
以有此後攷晉六朝志乃知護軍官品雖卑而於諸將  
軍有上下分蓋亦陳平護諸將之遺意也

李延壽作李神儁傳云出見犬邢劭戲曰為是宋鵲為



是韓盧神僞應聲曰為逐丞相東走為負帝女南徂及  
作徐之才傳又云嘗與朝士出游遇羣犬競走諸人試  
令目之應聲云為是宋鵲為是韓盧為逐李斯東走為  
負帝女南徂其重複如此必有一謊

北史李氏傳即延壽撰蓋倣班固例與唐俱涼武昭王  
嵩之後其載世系極詳然內云在秦者名興族為將軍  
生子伯祐建功北狄封南鄭公伯祐子德德子信為秦  
將虜燕太子丹信孫元曠仕漢為侍中弟仲翔位太尉



討叛羌於狄道陣歿葬狄道川史記李將軍傳所云其  
先自槐里徙居成紀實始此也仲翔曾孫廣云云按信  
於廣為六世其敗於楚為始皇二十三年稱信年少壯  
往及孝文之十四年僅五十八年而廣已用良家子與  
從弟李蔡俱為武騎常侍計其年當與信等不應世次  
之多若此且南鄭公非秦爵漢太尉為三公未聞年表  
之有李仲翔與翔之討羌而歿也以此知記述之不易  
李世勣傳卒年八十六攷之碑七十六當以碑為正也



傳稱大業末世勣為盜僅十七而勣以摠章二年卒至武德元年為五十二年勣是時年蓋二十五也然則大業四年勣已為盜矣傳載其訓弟語云年踰八十司馬通鑑云年將八十亦知其謬耳然至所謂年十二三為亡賴賊逢人則殺亦似非實錄蓋勣十二三時為隋高帝末年天下未嘗有大盜也

宋史樊師古本名若水字叔清即南唐進士走北以絲繩量江面濶狹者也後至給事中戶部使嘗因召對上



問之曰卿名出何書對曰唐尚書右丞倪若水亮直臣  
竊慕之上笑曰可改名知古倪若水實名若冰知古學  
淺妄引以對人皆笑之余家宋板唐書資治通鑑倪實  
名若水非若冰也且倪字子泉豈得為若冰乎脩史者  
歐陽玄不應孟浪至此且以是而笑師古能無為師古  
所笑也耶

王翦傳將兵六十萬伐楚行請美田宅園池甚衆始皇  
曰將軍行矣何憂貧乎王翦曰為大王將有功終不得



封侯故及大王之嚮臣臣亦及時以請園池為子孫業耳又云王翦子王賁與李信定燕齊地二世之時王翦及其子賁已死而孫王離擊趙項羽破禽離及攷二十六年瑯邪臺銘列侯武城侯王離列侯通武侯王賁倫侯建成侯趙亥倫侯昌武侯成倫侯武信侯馮毋擇以位次差之王離在李父賁前則離乃翦冢孫襲翦爵者也賁蓋翦之次子自以功封侯者也所謂有功不封者其時未定天下云耳及剖符而翦一子一孫為功臣之



首又當時列侯二人倫侯三人凡封侯者僅五人而李  
斯與蒙恬李信不與焉可謂嚴矣所謂成者其嬴姓耶



弇州四部稿卷一百六十三



欽定四庫全書

弇州四部稿卷一百六十四

明 王世貞 撰

說部

宛委餘編九

乾坤鑿度載太古百皇闢基文籀氏有巢氏遽理徵萌

始有熊氏

即庖犧亦名蒼牙

繼老神氏

天英氏

天老氏混沌氏天

英氏無懷氏炎帝神農氏烈山氏帝鼂氏老孫氏公孫



軒轅氏

三墳載太古之人皆壽盈易始三男三女以女生為姓  
始三頭謂之合雄紀生子三世合雄氏歿子孫相傳記  
其壽命謂之叙命記通紀四姓生子二世男女衆多羣  
多連逋是謂連逋紀生子一世通紀一姓是謂五姓紀  
男女衆多分為九頭各有居方故號居方氏生子三十  
二世強弱相迫中有神人提挺而治故號提挺氏生子  
三十五世通紀七十二姓故號通姓氏有巢氏教人居



巢穴積鳥獸肉聚草木實燧人氏教人庖食俱通姓氏  
後壽俱一太易伏羲氏燧人子也風姓號天皇太昊伏  
犧有庖升龍氏已前山墳連山易也人皇神農氏氣墳  
歸藏易也地皇軒轅氏形墳乾坤易也已上二則辭多  
穿鑿附會姑記以俟考

帝王世紀載有巢氏一曰大巢氏燧人氏太昊庖犧氏  
一曰伏羲蛇身人首女媧氏與伏羲氏俱蛇身人首一  
號希是為女皇皆風姓大庭氏柏皇氏中央氏卷須氏



要陸氏驪連氏赫胥氏尊盧氏混沌氏昊英氏有巢氏  
朱襄氏葛天氏陰康氏無懷氏凡十五氏皆世襲庖犧  
號

按此則有巢氏在後矣

炎帝神農氏至榆罔凡八世合五百三十年

帝王之貌如伏羲女媧蛇身人首神農人身牛首戴玉  
英玉勝黃帝龍顏顙項首戴干戈帝嚳駢齒帝堯鳥庭  
荷勝眉有八采豐下銳上帝舜黑色龍顏重瞳大口手  
握袞禹虎鼻大口兩耳三漏首戴鈞鈐冑有玉斗足文



履吉又云長頸鳥喙湯豐下銳上珠庭皙而有髯倨身  
而揚聲臂有四肘文王龍顏虎肩胛有四乳武王駢齒  
秦始皇蜂準長目鵞鳥膺紂聲漢高祖隆準龍顏美鬚  
髯左股有七十二黑子光武隆準日角大口美鬚眉昭  
烈臂垂過膝顧見其耳晉武帝炎髮委地手過膝齊太  
祖道成龍顏鐘聲鱗文偏體梁武帝衍兩髀駢骨頂上  
隆起有文在左右手曰武陳武帝霸先日角龍顏垂手  
過膝齊神武歡目有精光長頭高顙齒白於玉文宣帝



洋鱗身重蹠周文帝泰方額廣額美鬚鬚髮長委地垂手過膝背有黑子宛轉若龍盤之形隋高祖龍顏長上短下額有五柱入頂目光外射有文在手曰王唐太宗龍鳳之姿天日之表宋太祖正黑色方面大耳

其間位方隅者項羽目重瞳子力能扛鼎喑鳴叱詫千人皆廢王莽侈口露眼赤睛大聲而嘶反膺高視瞰臨左右孫權紫髯方頤大口長上短下劉淵子聰俱猿臂淵鬚長三尺餘當心有赤毫毛三根長三尺六寸聰左



耳毫長二尺非常光澤劉聰生而眉白鬚四尺餘慕容  
皝龍顏版齒慕容手垂過膝符堅背有赤文隱起成字  
曰艸付臣又土王臂垂過膝面有紫光慕容德額有日  
角偃月圭文魏什翼犍隆準龍顏立髮委地臥則乳垂  
至席

自古創業之君俱不利長子高辛氏顓頊長子帝摯不  
善崩弟堯代立陶唐氏帝堯長子丹朱不得立立舜有  
虞氏帝舜長子不肖立禹

公立而



太王長子泰伯文王長子伯邑考一肇王跡一剪商者  
也泰伯伯邑考皆不得立秦始皇長子扶蘇不得立立  
胡亥漢高帝長子惠帝立而絕文帝繼王光武長子東  
海王不得立立明帝魏武長子曹昂戰沒立文帝孫堅  
長子策無後立權孫權長子和不得立立休司馬懿長  
子師無子立司馬昭宋武長子義符廢立文帝劉淵長  
子和廢四子聰代劉曜長子胤前沒虜止為王符健長  
子廢立次子代石勒子弘為虎廢石虎長子邃宣俱前



僂慕容儁前子死次子暉立慕容垂長子令被殺次子  
寶立齊蕭太祖長子武帝立一世而絕從子繼之梁武  
帝長子昭明早逝次子簡文代陳武帝長子死於江從  
子蒨立北齊神武長子澄弒次子洋立周文長子安定  
公立而廢少子武帝立隋高祖長子勇廢次子煬帝立  
唐高祖長子建成僂次子太宗立朱梁太祖晃長子友文  
墜馬死少子友貞立後唐太祖克用長子落落陣亡少  
子存勗立明帝長子從榮僂從厚立吳王楊行密長子



渥廢次子隆演立南唐徐溫長子知訓以亂死義子知  
誥立蜀主王建長子元膺僂次子衍立南漢劉隱闔王  
潮子俱不立立弟後蜀孟知祥公主子在唐不得立立  
景宋太祖長子德昭自殺弟太宗立太宗亦自作創始  
長子元佐不得立立真宗契丹安巴堅子東丹王不得  
立立次子德光金阿固達子富勒呼不得立立弟烏奇  
邁元太祖長子先沒立次子憲宗世祖長子珍戩與我  
高皇懿文太子俱先歿然則由古及今創業之主其為



嫡長子而得傳位及後人者僅禹子啟也亦異矣

尚書令本執政官至隋而重大業初僅楊素一人武德  
中冊拜太宗後絕不復設代宗朝加郭子儀固辭不敢  
當後邠寧帥王行瑜欲得之以子儀例不予加尚父太  
師賜鐵券然自是行瑜及李茂貞錢鏐王鎔馬殷高李  
興錢元瓘錢俶得為之皆藩鎮也楚王元佐鎮王元偓  
周王元儼皆宗室也大臣贈者以無兼官為重若趙韓  
王韓魏王是也



天策上將亦唐高特設以褒太宗者後加楚王馬殷馬希範皆開府如故事宋真宗加楚王元佐則虛稱也如周王元儼輩用以贈官北齊有贈假黃鉞至宋贈入朝不趨劍履上殿尤無謂

古官名有極賤而極貴者僕射有極貴而極賤者太師樂官之長也以文名武者漢昭文將軍儒林校尉以武名文

者唐有武學博士今名有俗而官則雅者庶子洗馬名有武而官則文者兵馬指揮名有文而官則武者留守



大而小者大使小而大者副使名與實不相蒙者祭酒

古貴而今賤者宣撫招討巡檢古賤而今貴者侍郎

漢趙

后通官  
奴侍郎

偶見有辭上柱國者以為人臣無上不知此官始在楚

為勲官在令尹下諸卿上隋為從一品階官在唐則為

四品以上階官不足道也古今官名有非人臣所宜稱

者總百揆

舜禹以後司馬昭炎桓玄劉裕蕭道成蕭衍高洋陳霸先楊堅李淵朱全忠俱為之蓋即

真之

宰衡

漢王莽晉梁王彤

天柱大將軍

魏爾朱榮後加爾朱兆高歡皆辭

太



上秦公

魏胡國珍

無上王

魏莊帝凡子邵

宇宙大將軍都督六合

諸軍事

梁侯景

天地太師

成范長生

尚父

周太公望漢董卓唐郭子儀李輔國王行

瑜五代錢鏐

回天再造功臣

朱全忠

皇天之下一人之上

元帝師

安國相王

睿宗

鎮國大長公主

睿宗妹太平公主

相國丞相皆秦官秉政者太師太傅太保古三公後以  
為三師位上公以太尉司徒司空為三公故也相國自  
呂不韋蕭曹後罷不設至司馬昭父子以此篡魏後遂  
因之東漢有三公而無丞相曹操父子以此篡漢亦遂



少置渡江之後惟王尊會稽王昱以序遷者三師惟太師為尊魏避司馬師諱改為太宰高齊竝置而以太宰位太師上左右丞相位太宰上然董卓以相國遷太師孔光以丞相宇文恭以大丞相遷太師大冢宰則又以太師為尊也元帥即漢太尉晉都督中外諸軍職也金為都元帥權甚重而位在三公丞相下元則至輕僅若今之指揮使耳至加以天下為稱則亦非人臣所宜當也



相國魏司馬昭司馬炎晉司馬倫桓玄劉裕宋蕭道成  
齊蕭衍梁侯景陳霸先偽漢劉粲劉曜偽趙石虎石琨  
魏高洋後周楊堅唐朱全忠皆不久而成禪代者也

大丞相魏爾朱榮高歡宇文泰後周楊堅隋李淵契丹  
趙延壽韓德讓元巴延

天下兵馬元帥唐肅宗代宗德宗皆以皇太子領之朱  
全忠以梁王領之肅宗為大元帥五代時錢鏐錢俶以  
吳越王領都元帥北魏初加爾朱榮柱國大將軍位丞



相上後遂加天柱若徽稱然宇文泰在西魏與七功臣為八柱國加者漸多至隋乃以上柱國為崇加而柱國次之唐時上柱國品遂下至第四明興始復正之以上柱國為正一品勲柱國為從一品勲

漢列侯不與政而勲重者位特進後以大將軍鄧騭辭位加同三司之儀以後得開府辟僚屬又與三公俱開黃閣故曰開府儀同三司羊征南位開府謙讓不肯辟召是也魏晉之際太保王祥以睢陵公太保衛瓘以蘭



陵公司徒魏舒以劇陽子老就第太保同保傅司徒同  
三司亦此意但不入官耳晉宋齊梁陳俱不輕受北魏  
爾朱世隆辭太保加同三師在三公上後周及隋改為  
勲官在柱國下有三等曰上開府曰開府曰儀同至唐  
而始復故文皇之世唯尉遲敬德辭都督乃得加之位  
次房司空以後復為階官之最其次特進國初亦因之  
然官至太尉司徒司空而曰儀同三司名實抑何舛也  
國初去開府儀同以特進光祿大夫冠正一品是矣然



以公卿而稱大夫如尚書再滿考階曰資德大夫勲曰  
正治上卿其勲階亦自相矛盾不可不改正也予嘗戲  
謂官至卿而稱大夫者尚書左右都御史也官止大夫  
而得稱卿者太常至尚寶也

左傳趙簡子代衛誓師曰克敵者上大夫受縣下大夫  
受郡杜氏註曰千里百縣縣有四郡當是時縣蓋統郡  
也按堯分天下為九州舜益以十二州禹復為九州其  
所統者五等之國耳自諸侯兼并地日益以大而始有



郡縣之名秦孝公命商鞅分秦地為四十一縣後并天下罷侯置守凡三十六郡而郡始改而統縣矣漢氏因之而兼有王國侯國武帝始復以十三州統郡國後設刺史權尊而秩卑若今之巡按御史至後魏末而刺史握兵益重遂為州牧三國晉氏往往復設將軍督軍而州有不領郡者郡亦有不屬州者隋煬帝悉改州為郡諸邑屬焉其大抵因秦之舊唐復以郡為州而開元天寶之際又以兵興設節度使統之其不建節者為觀察



而亦有畿內如同華江左如蘇常不屬藩鎮者宋興藩鎮為虛銜而實則以州領縣其得稱為府者或以建立行都如魏州興唐或以天子藩封建節如宋州歸德府之類蓋小則為州為軍大則為府自故相以及曹郎皆得次第任之重者判輕者知而南渡之後又設招討制置安撫以彈壓之上而宣撫尚得兼領州府蓋又隱然唐舊矣元始以府領州縣府之大者為路縣之大者為州而州又有領縣者又為行省以分轄之軍事兼屬焉



兵興之際或設行樞密院事定則否大省則有行御史臺小者有肅政廉訪使國朝因之罷路悉為府後降行省為布政司行樞密院為都指揮司行臺廉訪總名之曰按察司以綱維郡縣後以遠不相及復設守巡兵備分理之又以三司不相聯屬歲命御史稽察之巡撫都御史以督攝之而府體益卑矣今之異於古者州屬府府之上為監司監司之上為臺察而又有小未安者既云州而又云府名所當改定也元以行中書省故名各



省今兩畿曰南北直隸則各省當云某司隸可也

秦雖廢封建而功臣亦有一二封侯者見於嶧山之果  
諸碑可攷凡列侯倫侯二等如王離王賁之類列於右  
丞相去疾上自漢以列侯為丞相武帝以丞相封侯至  
霍光廢昌邑王之奏而御史大夫誼列於四嗣侯上矣  
然九卿猶在下也自後有子侯有小侯職日就卑而章  
服猶如故按漢有王侯而無公其封王者不以一字二  
字分等第至曹操封魏公進封王而後禪代之主皆取



法矣

魏末定五等封郡公縣公郡侯縣侯伯子男開國者皆金印紫綬關內侯在子男下猶金紫至關外侯則銀青矣皆世襲晉及六朝因之自郡公而上開國則易姓之漸也

元魏及北齊不受王爵而有功則別封郡公侯至有帶三四爵者然同姓異姓皆不得封國王而郡縣公侯益卑矣後周宇文泰辭安定王遂為安定公終身而其子



嗣位進封功臣為晉趙燕宋等國公而無郡王隋氏因之然郡縣公侯而下益多且賤不足計也唐以天子子弟封一字王稍疎而有功者如淮南趙郡江夏王之類文武功臣如趙國公無忌梁國公房玄齡之類皆得世襲蓋自周而至唐異姓不王矣然國公郡王皆從一品也後至玄宗封安祿山為東平郡王以後王爵遂輕而兵馬押牙亦有封王者矣然文臣不王如故也天寶以後王公亦不得世襲而末年藩鎮強威逼帝室以王公



不足重而朱全忠李茂貞李克用皆真王矣宋興復承  
唐之舊而親王郡王以宗室叙封公侯伯以文武臣第  
加不以功而以資然異姓猶不得王至徽宗舉以封童  
貫而南渡後張韓遂因之秦檜韓侂胄以執政封矣元  
承遼金之後王爵尤易真王即將相可得之明興始定  
為之等天子之子弟封親王親王之子弟為郡王皆自  
天子而下近於君者也開國公得贈王自侯而伯皆在  
正一品上雖師傅之尊班不得竝矣蓋略採漢氏之意



而加詳雖襲唐宋之名而加貴者也

古之封戶有極異者漢以城邑封侯初自二百餘戶至萬戶其一邑之徭賦悉予之子孫能休養生息者或數倍於初高齊以後封爵侈而戶口不繼於是別立真食之數大槩十之一二耳封祿止是調絹量戶而計然皆不入御也至宋則止食本官之祿而戶封實封皆以入銜為美觀而已歷代官制無如宋氏猥雜甚至勲階銜位十餘條不知實職所在元豐稍有次序亦未盡善



設官慕古而不經者無如新莽其次宇文周莽以宰衡  
安漢公攝帝以王舜為太傅左輔甄豐為太阿右拂甄  
邯為太保後承即真後封子安新嘉辟諸孫為功隆功  
明等公以舜為太師封安新公平晏太傅就新公少阿  
義和劉歆國師嘉新公布衣哀章國將美新公為四輔  
位上公甄邯大司馬王尋大司徒王邑大司空為三公  
甄豐更始將軍布衣王興衛將軍孫建立國將軍布衣  
王盛前將軍俱封承新章新等公凡十一公又倣堯典



四星四獄以命四輔月刑日德斗平以命三公更大司

農曰義和又曰納言大理曰作士

用作字入官

太常曰秩宗

大鴻臚曰典樂少府曰共工水衡都尉曰予虞

用予字入官

光祿勳曰司中太僕曰太御衛尉曰大衛執金吾曰奮

武中尉曰軍正又置主乘輿服御官曰大贅皆上卿郡

太守曰大尹都尉曰大尉縣令長曰宰御史曰執法公

車司馬曰王路又有五侯將帥左伯右伯東通靈將五

司大夫太子有師疑傳丞阿輔保拂胥附犇走先後禦



侮又有師友祭酒俱秩上卿又置卒正連率大尹職如  
太守屬令屬長職如都尉置州牧部監二十五人見禮  
如三公監位上大夫各主五郡公作牧侯作卒正伯連  
帥子屬令男屬長皆世有官無爵者為尹分長安城旁  
六鄉置帥各一人分三輔為六尉部河東河內弘農河  
南潁川南陽為六隊帥置大夫職如太守屬正職如都  
尉更名河南大尹曰保忠信卿緣邊又置竟尉以男為  
之宇文氏建六官其小冢宰以下至大夫上士一依周



制而不能正其職也天元增設大前疑大後丞大左輔大右弼後楊堅執政復有左右大丞相三公六官併疑丞而下凡十五公矣

先為道士仕宦者唐侍中魏徵丞相盧程先仕宦後為道士者唐禮部侍郎賀知章又河南參軍鄭銑朱陽丞郭僊舟以獻詩罷官度為道士

先為僧而蓄髮仕宦者宋湯惠休唐賈島蔡京先仕宦而削髮為僧者南齊劉勰梁劉之遴張纘宋饒德操皆



名士也。懿即著文心雕龍者。法名慧地。一年而卒。纘為執政。方岳之遴。官禁秘以候景亂。削髮尋皆為湘東王所醢死。又北魏元太興以西河王衛尉卿削髮名僧懿為僧為道而舉進士者。唐劉軻前後仕宦而中為道人者。梁伏挺為行者。唐徐安貞挺安貞皆以居官有罪懼發故也。

由僧徑拜大位者。唐左衛大將軍梁國公懷義。元太保參議中書省劉秉忠。明太子少師姚廣孝。懷義嬖倖不



足言東忠廣孝皆名臣廣孝不蓄髮不婚娶

由道士徑拜大位者唐嵩山于什方為正諫大夫同中書門下平章事葉靜能為國子祭酒鄭普思為秘書監尹愔為諫議大夫仍以道士服治事明邵元吉為禮部尚書陶仲文為少師恭誠伯

有內職而移為將相者中書令樞密使漢官兼內外人者將行即大長秋有內臣而真為宰相者秦丞相趙高魏太師大司馬都督中外諸軍錄尚書馮翊王宗愛唐



尚父司空中書令博陸王李輔國南漢太師內樞密使  
龔托宋太師領樞密院事廣陽王童貫少保梁師成元  
大司徒領中書左丞李邦寧有儒臣而入為內臣者太  
史公司馬遷為中書令有內臣而出領儒臣者內侍監  
魚朝恩兼判國子祭酒南漢至狀元及第及雅士名儒  
俱先下蠶室而後得入用事抑何不幸也

樂巴初以天闥為中黃門後陽道開通自言出列卿郡  
張平養子通於平妾因自割其勢後事苻堅至大將封



侯號萬人敵史不載其割勢事見十六國春秋楊素弟約少為查所傷遂成宦者後為內史令封郡公而無子樊叔略長九尺被腐為高氏給使殿省走周累典大郡封清鄉縣公謚曰襄見循吏傳

女子改國號稱帝者女媧氏周武氏稱制者漢呂后女子封侯者女列侯陰安侯漢高祖丘嫂鳴雌亭侯許負魯侯底氏子奚涓死事無子母封十九年薨已上高祖封臨光侯呂嬃高后封鄼侯蕭何子嗣侯祿薨高后封



何夫人為鄼侯

女子為女官者女侍中後魏元義妻胡氏齊高岳母山氏趙彥深母傅氏南漢盧瓊僊女尚書魏明帝選知書女子為之女學士唐德宗朝貝州宋氏五女若萃若昭若華若倫若憲陳後主時宮人袁大捨等女博士宋孝武朝韓蘭英

女子為男官者女將軍晉王廙起兵顧深母孔氏年百餘以為軍司馬廙復以已女為貞烈將軍唐行營節度



許叔冀以衛州女子侯氏滑州女子唐氏青州女子王氏歆血赴義奏授為果毅陳女白頸鴟為契丹懷化將軍侍夫數十人

女子執國政者齊陸太姬司綸綍者唐上官婕妤司史事者漢曹大家主兵者唐平陽公主洗夫人

女子詐為男子而有官位者齊揚州議曹錄事婁逞唐昭義軍兵馬使國子祭酒石氏朔方兵馬使御史大夫孟氏蜀司戶叅軍黃崇嘏楊升菴詩話又有女校書薛



濤女進士林妙玉濤乃稱謂之詞妙玉宋女童應試封孺人

封爵有故加以惡名者頡羹侯劉信一本曰羹戛侯高帝微時過信其母戛釜以郤帝故也不義侯子密蒼頭子密弑其主彭祖故也悖義將軍佞濁子符承祖元魏倖臣以罪斥故也違命侯李煜宋以其不降附故也他如宥罪歸命恩赦之類亦多以降附封者若紂世鬼侯漢曲逆侯陳平挾術侯劉昆皆以國邑鄉名封而不



佳

漢又有勅節執節挾釐稻夷有利烏氏薪館沈猷參驥

栗節交夷抑裴蘭旗蒲領乎纂即來麗茲擢頃橐祖汁

防

汁音什防音方  
今本遂作什方

關氏汴陵南鄭陸量土軍煮棗下摩

輝渠濕陰河綦衆利潦嫫南發干 鱸 蕢 餅

獠 郎 鹵 梧 軼 瞭 芒 既非郡邑而字義

頗不明了疑即鄉亭名也

魏武有發丘中郎將摸金校尉見陳琳檄宋廢帝復設



此官漢西域有僮僕校尉

謚法白虎通卿大夫有爵故有謚士無爵故無謚春秋  
之世周齊晉衛君及卿有謚大夫無謚若羊舌肸祁奚  
蘧瑗之類俱無謚也魯大夫亦有謚如臧文仲邠昭伯  
之類俱有謚也秦楚宋鄭卿無謚如百里奚孟明子文  
孫叔華元子罕子皮子產子太叔之類俱無謚也吳越  
君臣俱無謚如闔閭句踐之類俱無謚也戰國君有謚  
臣無謚秦有天下君以世臣無謚漢制列侯比於春秋



有謚其無爵者不謚故西漢之世雖嗣侯亦謚也東漢  
之世雖三公亦不謚也晉渡江而後用司徒導言命公  
卿無爵而賢者亦予之謚無爵而謚自東晉始也處士  
之有謚自苻秦之於張忠公孫永始也其有私謚也則  
自春秋黔婁始也婦人從夫之謚也其別謚者則自周  
穆王之哀叔人始也臣有三謚則衛侯之於公叔貞惠  
文子也生而預謚則衛侯之於北宮貞子析朱成子也  
戰國之臣死無謚然生而有美號者武信武安剛成諸



君文信侯之類是也春秋之世出犇而仕他國者有謚如臧武仲中行文子之類是也崔杼樂盈身為僂矣族已滅矣豈其故臣而為之謚抑左氏自立之也

謚法所不載者恬漢牧邱侯石慶辟周宋辟公虎相支切虎之有角者漢廣陵侯劉表蕩周晉國公宇文護瘞周衛侯姬其癘周齊侯呂慈母赧周天王延淵明太子少保徐善述範漢陳文範寔私謚昌元易國武昌公何伯祥慧北魏廣陵王元羽一唐銀青光祿大夫司馬貞



一公承禎傑金梁國傑忠公大臬齊宋尹國孝齊公趙  
克脩靚周慎靚王

有謚而無釋義者彊梁光祿大夫江革尅北漢定陶男  
慕容契傾唐左散騎常侍房式愷周康國公柳帶韋臯  
周大右弼代王宇文達方周姑臧公令狐瑾道遼道宗  
洪基興遼興宗宗真熙金熙宗亶我明熙祖淳我明淳  
祖哲宋哲宗徽宋徽宗寧宋寧宗又秦寧公明中山武  
寧王達制漢高遠侯丙猜崩成侯周滌祗漢衍侯翟山



恒我明恒皇帝敷漢定侯劉越柳侯劉罷師崇漢崇帝

父桓帝

夏崇宗乾順慶南唐慶宗李榮後周慶祖郭簡敢

唐武都公權萬紀頌漢臯虞侯劉顯宜梁梁都侯韋放

穀漢祁侯繒賀式漢士軍侯宣義代唐代宗勝漢河陵

侯郭容衍漢邯鄲侯劉仁賁漢戚侯季長申周陳侯媯

犀侯于漢柳侯劉自為安郭侯劉傳富息漢盧水侯劉

爵冲漢冲帝晉宋十四王野周大前疑越王宇文盛聞

周滕王宇文逌僭周右大丞相趙王宇文招專唐尚書



宋慶禮初謚繻周鄭伯姬駘替梁上黃侯蕭暉脫陳西  
豐侯周敷闇周太子太傅斛斯徵利周陳侯媯曜驕梁  
中書令蕭子顯蔡高陽公許敬宗刻漢成安侯郭賞惑  
周陳王宇文純義明高文義穀康武義茂才靜北魏靜  
帝又李文靜憲略宋賈武略達元張武略弘靖初謚釋  
義謀略計畫也可以證楊用脩之謬真宋真宗周魯侯  
姬淠晉蘭陵世子衛恒考周王嵬魯侯姬酉漢平昌侯  
王接笛川王劉尚等四人玄唐玄宗明玄皇帝博唐陳



國公竇抗仁漢一皇宋元明三宗一祖隋唐國公李昫  
慎周衛侯姬頽陳侯媯圉戎漢輝渠侯應元寬梁廣信  
侯蕭映素宋宣德郎徐節素積初謚濟金都國定濟公  
完顏滿都赫伯唐宋國蕭貞祐公瑀智元武都智敏王  
茂蘇蘇

有謚忠孝者唐太原王武士臽郇國公韋陟也有謚文  
質者宋博羅主簿羅從彥也

棟今謚法不載而漢中山靖王孫昆侈嗣王薨謚曰棟



音與糠同惡謚也好樂怠政曰糠又有安陽侯劉延被陽侯劉偃皋虞侯劉定謚亦同

天子為臣下作碑者唐太宗為魏徵高宗為李勣玄宗為張說德宗為段秀實宋太宗為趙普仁宗為李用和神宗為韓琦國朝太祖為徐中山達太宗為姚恭靖廣孝孝宗為張昌公巒而已

古有稱金貂者常侍侍中挿貂以金為柱也漢稱金紫者金印紫綬也其後江左入銜曰金紫光祿銀青光祿




猶此意也唐所謂金紫者紫衫金帶也又賜紫及金魚袋後元復以金紫銀青入銜國初亦因之印在秦漢以為佩服之章至六朝尚因之故至小其丞相列侯不過寸餘不以施奏牘也唐用龜魚以代印而印用之奏牘矣至明而印之寸分加大矣明之所謂綬非綬制也帶也其牙牌則以代印及龜魚也古王公列侯皆金印丞相將軍亦金印今法親王金寶一二品銀印餘皆銅印古印列侯存者多銅印人不能曉所謂按古賜印外許



得自製銅木牙印蓋倣印製而為之金銀印不能存而銅獨得存故也

唐時將相告身用金花五色綾紙至宋則用織成花綾以品次有差宋勅俱草書後用三省長官僉押尚書印然無御寶當時每授官則有之至國朝考最始給與一品至五品皆誥六品以下勅花色殊異公侯一品玉軸伯及二品犀軸三品四品鍍金軸餘角軸內惟御寶加於年月之上其特使則有勅勅用小龍墨欄黃紙





弇州四部稿卷一百六十四